



Filmiliortut isiginnaartitsisartullu nunatsinneersut nunarsuara sinnerani filmiliaminnik filmilianiluunniit peqataaffigisaminnik takutitsisoqassatillugu peqataanissamut qanoq tapersersorneqarsinnaanerat pillugu apeqquteqaat aallaavigalugu oqallisissiaq.

(Inatsisartunut ilaasortaq Peter Olsen, Inuit Ataqtigiit)

Qujanaq Inatsisartunut ilaasortaq Peter Olsen siunnersuummut.

Tulluusimaarutigissavarput filmiliornermi maani nunatsinni pitsaasumik ineriartortoqarmat. Tamatta tulluusimaartarpugut, isiginnaartitsisartuutigut pikkorissut nunani allani sanaani takugaangatsigit, qilanaartarlutalu, filmit kalaallisut oqaasertallit maani saqqummeqqaarnialeraangata.

Siunnersuuteqartutulli isumaqarpunga, taakkununga pineqartunut tapersersuinerusariaqartugut. Uani filmiliortartunut isiginnaartitsisartunullu.

Siammasinnerusumilli saqqummiilaarlanga, maannakut Naalakkersuisut pingaarnersiuisarnerannik takutitsisumik. Uani eqqarsaatigaara assammik arsarnermi VM. Tassani tamatta tulluusimaarutigagaugut arnat nuna tamakkerlugu unammisartut angusaat. Tassunga atasumik Naalakkersuisut pingaartissimavaat Norge-mut angalanissartik tapersersuinertik takutinniarlugu. Aamma tamanna ajunngilaq. Kinguneranili takuarput, assammik arsartartut kattuffiat aningaasameertut. Uanilu apeqquterujussuanngorpoq pitsaanagerusimasinnaannginnersoq assammik arsartartut kattuffiannut aningaasat atorsimanissaat, Naalakkersuisut ilaasortaasa misigisassarsiornerannit?

Mianersuutigissavarput, kukkuneq nangissannginnatsigu filmiliortartunut isiginnaartitsisartunullu tunngatillugu. Demokraatini qularutiginngilluinnarparput, filmiliortartut isiginnaartitsisartullu nunatta nittarsaannissaannut pitsaanagerusut politikkerininngarniit. Tamannalu pisinnaakuttoorpoq nunani allani filmiliamik takutinnerannut atasumik, takuteqqaarneruppat imaluunniit festivaliuppat apeqqutaatinngu. Taassuma qulakkeenera nunatta pilerisaarutigineqarneranik kinguneqassagalarpoq, taamatuttaarlu uagut politikkerit tungitsinniit malunnartitsinerussalluni, nunatsinni filmiliornerup maannakut killiffianik tulluusimaarutiginninnitsinnik.

Aningaasatigut tapersiinitsigut, isiginnaartitsisartugut filmiliortartugullu nunat tamalaat filmiliornermik festivalertitsinerinut takutitseqqaarnenilu peqataanissaannut takutissavarput, pginnaaneri pingaartikkigit ineriartortuarnissaannullu tapersersuinissarput kissaatigigipput. Taamaaliornikkut tapersiinnaavugut filmiliortartutta nunani tamalaani filmiliorinnaanerannut ammaassinissamut filmiliagullu annertunerusumik qaammarsaavigitillugit nunarsuarmi tamarmi akuerineqartussanngorlugit.

Taamatutaaq puigussanngilarput iluatinnaatilittut inissisimaneq, kalaallit filmiliaasa nunatsinnit nittarsaassinermik kulturittalu nittarsaanneqarnerat nunani allani. Filmi aqqutigalugu oqaluttuarisaanerput,



nunatta isikkua ileqquliussagullu pillugit nunarsuup sinneranut avitseqatigisinnaavagut inuiaqatigiit annertunerusumik paasineqarlutillu ataqqineqarnerulerlutik qanorlu inuuniarnerput paasineqarnerulerluni.

Naalackersuisunit Inaatsisartunilu partiinit allanit uunga isummersuutit tusarnissaat qilanaaraara.